

Дорогие братья и сестры! В связи с наступающим 96-летием со дня отречения Государя-Императора Николая Александровича от престола размещаем на нашем сайте достаточно редкий Акафист святым царственным страстотерпцам. Пусть Господь молитвами святых царственных страстотерпцев хранит всех вас на многая и благая лета!

Кондак 1

Избраннии царственнии страстотерпцы,/ едина домашняя церковь Христова,/ Николае, Александро, Алексие,/ Ольго, Татиано, Марие и Анастасие,/ вы, союзом любви связуеми,/ яко агнцы, Христу Богу верою последовали есте/ и, в страданиях смерть претерпевше,/ Царствия Небеснаго наследницы явилися есте./ Ныне же, дерзновение ко Господу имуще,/ молитесь о земнем отечестве вашем, да прославляем вас сице:

Радуйтесь, царственнии страстотерпцы,/ земли Российския хранителие и молитвенницы.

Икос 1

Ангельскими силами укрепляеми во истиннем пути, седмочисленнии страстотерпцы, о житии праведнем и богоугоднем ревновали есте, да явите народу русскому образ благочестивых царей. Сего ради прославляем вас сице:

Радуйтесь, страх Божий в сердце, яко основание, положившии;

Радуйтесь, премудрость Божию истинне возлюбившии.

Радуйтесь, все упование на Бога возложившии;

Радуйтесь, отечеству вашему верно послужившии.

Радуйтесь, христианскаго благочестия твердое правило;

Радуйтесь, царственного рода Российскаго похвало.

Радуйтесь, Православныя веры крепкое исповедание;

Радуйтесь, страждущаго народа нашего утешение.

Радуйтесь, царственнии страстотерпцы, земли Российския хранителие и молитвенницы.

Кондак 2

Видя Господь покаяние народа нашего, егда смутная времена насташа, умилосердися и яви милость Свою во избрании Михаила царя, егоже иконою Пречистыя Богородицы, Феодоровская именуемою, чрез родительницу благослови, да будет икона сия покров и защищение ему и всему новоизбранному царскому роду и во утверждение державы Российския. Сего ради благодарне вопием Богу: Аллилуиа.

Икос 2

Разумеша людие Российстии, яко избранием на царство новаго рода благочестиваго, утиши Господь нестроения и смуты в Земли нашей, принесоша обет вернаго служения роду сему. Мы же, любви и ревности тех подражающе, к вам, царственнии страстотерпцы, яко наследником сего избрания со умилением вопием:

Радуйтесь, венец и похвало рода царскаго и священнаго;

Радуйтесь, корене благочестиваго преславных отрасли.

Радуйтесь, Патриарха Российскаго Филарета святое прозябение;

Радуйтесь, попечению его о Церкви и отечестве подражавшии.

Радуйтесь, великия старицы инокини Марфы благословенное наследие;

Радуйтесь, покорность воли Божией от нея восприимшии.

Радуйтесь, пред иконою Божия Матере Феодоровския молитвы присно возносившии;

Радуйтесь, все упование на помощь Богородицы с верою возлагавшии.

Радуйтесь, царственнии страстотерпцы, земли Российския хранителие и молитвенницы.

Кондак 3

Сила Божия и промысление Всевышняго явися в рождении твоём, царственный страстотерпче Николае, великаго бо святителя имя восприем, заступник Российския Земли показался еси. Многия же скорби и болезни, подобне Иову праведному, в житии претерпев, ныне с лики страстотерпцев наслаждаешься райскаго блаженства, воспевая Богу: Аллилуиа.

Икос 3

Имея сугубыя заступники и покровители в рождении твоём Иова многострадальнаго и Николая чудотворца, державный страстотерпче, добродетелем тех последовал еси. Мы же, дивящися промыслению Творца, во святых сих образ благочестия указавшаго ти, благоговейне воспеваем сице: Радуйся, в молитвах святителя Мир Ликийских присно призывая; радуйся, помощию того Российскую Державу праведно окормляя. Радуйся, образом кротости тому уподобивыйся; радуйся, милосердие многое, якоже оный, явивый. Радуйся, терпение Иовле в сердце твоём имевый. радуйся, верность Богу в житии твоём до конца сохранивый. Радуйся, в тяжких бедах, якоже оный, благодарение Богу приносивый; радуйся, вся находящая на тя со смирением приемый.

Радуйтесь, царственнии страстотерпцы, земли Российския хранителие и молитвенницы.

Кондак 4

Бурю смущения, воздвигаемую от человек безбожных в стране нашей, видя, страстотерпче Николае, не смутился еси в сердце твоём и, все упование на Бога возложив, не возроптал еси, егда отвергоша тя люди твоя; обаче с верою воспел еси Богу: Аллилуиа.

Икос 4

Слыша о мятежах, болезнях и междоусобных бранях, нашедших на землю Русскую, во узах сый, страсотерпче царю Николае, моление о людех ея непрестанне приносил еси, милосердие Божие к ним призывая. Сего ради мы воспевает тебе тако: Радуйся, от юности отечество и народ твой возлюбивый; радуйся, яко и во отвержении любовь сию сохранивый. Радуйся, помазание на царство с благоговением приемый; радуйся, образ благочестиваго царя миру явивый. Радуйся, царский венец со смирением на ся возложивый; радуйся, венца страданий от Господа удостоенный. Радуйся, царское служение, яко послушание Богу, разумевай; радуйся, поношения, яко крест, вземый и с терпением понесый.

Радуйтесь, царственным страсотерпцы, земли Российской хранителие и молитвенницы.

Кондак 5

Богосветлый светильник во мраце скорбей благоверней супружнице твоей явился еси, царственный страсотерпче Николае, указуя и возглавляя путь ея, якоже повеле Господь. Мы же, прославляюще ваш благословенный союз во Христе, хвалу Богу воздаем, поюще: Аллилуиа.

Икос 5

Видя царственный страсотерпец юницу Александру, яко голубицу чисту, избра ю себе в благоверную супружницу, православную царицу и мать народа Российскаго. Мы же, ведуще усердное служение ея, воспевает сице: Радуйся, именитаго рода благочестивое прозябение; радуйся, от лютерския веры к Православию образе спасительнаго прехождения. Радуйся, всем сердцем молитву возлюбившая; радуйся, о службе Божией сердечно ревновавшая. Радуйся, словом Божиим и писанием святых отец себе наздавшая; радуйся, уставы церковныя благоговейно соблюдавшая. Радуйся, русское благочестие достойне восприемшая; радуйся, истинныя жизни во Христе приобщившаяся.

Радуйтесь, царственным страсотерпцы, земли Российской хранителие и молитвенницы.

Кондак 6

Проповедует житие ваше брака святаго чистоту, благовернии Николае и Александро. Вы бо, благодать сего великаго таинства достойно восприемше, даже до мученическа кончины верность Христу и любовь друг ко другу сохранили есте, присно воспевающе Богу: Аллилуиа.

Икос 6

Возсия в стране Российстей, яко прекрасная светила, благоверная царственная чета Николай и Александра, супрузи, союзом любве Христовы связуемии. Мы же, прославляюще образ их целомудренного и добронравного жития в мире сем, со благоговением воспеваем сице:

Радуйтесь, всем сердцем Бога взыскавшии;

Радуйтесь, в путех Господних непорочно ходившии.

Радуйтесь, двоице честная, свыше избранная;

Радуйтесь, двоице святая, славою и честью от Бога венчанная.

Радуйтесь, целомудрие супружеское многочадием прославившии;

Радуйтесь, чада ваша, яко новосаждения масличная, окрест трапезы Небесныя собравшии.

Радуйтесь, супруги во благочестии и любви жити научающи;

Радуйтесь, мир Христов оным милостивно низпосылающи.

Радуйтесь, царственнии страсотерпцы, земли Российския хранителие и молитвенницы.

Кондак 7

Хотяще ваш дом благочестно устроить, любовь, яко основание, положили есте и брак честен добре соблюли есте, благовернии супрузи Николае и Александро. Темже, и дщери ваша, яко мудрыя евангельския девы, воспитавше, в невесты Христу уготовали есте. С нимиже ныне вкупе воспеваете Богу: Аллилуиа.

Икос 7

Новую милость дарова Господь народу русскому, целомудренныя дщери царственныя четы Ольгу, Татиану, Марию и Анастасию. Тья бо, женам мирносицам подражающыя, елеем милосердия болящим и страждущим послужиша и, смерть за Христа приемша, ныне Престолу Божию предстоят. Сего ради прославляем их сице:

Радуйтесь, дщери царицы, обетований Божиих сподобльшыся;

Радуйтесь, заповедь Божию о почитании родителей соблюдыши.

Радуйтесь, достоинство царственное свято соблюдыши;

Радуйтесь, стихиями мира сего не порабощенныя.

Радуйтесь, людем, сущим в бедах и скорбех, яко Христу, послужившыя;

Радуйтесь, за врагов своих усердно молившыся.

Радуйтесь, агницы непорочныя, в жертву Богу себе принесшыя;

Радуйтесь, невесты Христовы, в чертозах Жениха Небеснаго пребывающыя.

Радуйтесь, царственнии страсотерпцы, земли Российския хранителие и молитвенницы.

Кондак 8

Странно и чудно бысть рождение твое, святыи царевичу Алексие. Плод бо благославен молитв Саровскаго чудотворца и чаемый наследник царственных родителей быв, слава,

надежда и упование явился еси всем концем Земли наша. Сего ради людие российстии с радостию благодарственно воспеша Богу: Аллилуиа.

Икос 8

К вышним душею чистою устремляся, святой царевичу Алексие, измлада болезнь, яко крест от Господа данный, безропотно понесл еси, последи же, яко агнец незлобивый, руками злочестивых убиен, молитвенник пред Богом явился еси. Сего ради воспеваети ти сице: Радуйся, отроча, от утробы матере Богом предъизбранное; радуйся, чадо, молитвами Саровскаго чудотворца России дарованное. Радуйся, страдальче, измлада скорби и недуги безропотно понесый; радуйся, царевичу, в болезнях сострадание к людем обретыи. Радуйся, наследниче, лишение царства земнаго со смирением приемый; радуйся, страстотерпче, Царствия Небеснаго от Бога удостоенный. Радуйся, агне незлобиве, от безбожных закланный; радуйся, царственный отроче, венцем нетленным от Царя царствующих увенчанный.

Радуйтеся, царственнии страстотерпцы, земли Российския хранителие и молитвенницы.

Кондак 9

Всяк ум человеческий смутися, егда в земли нашей беззаконие умножися, истина помрачися и мерзость запустения на месте святем ста. Ты же, царю Николае, изгнание, поругание и темничное заточение мужественно претерпев, сын верный Святыя Церкви и страстотерпец Христов явился еси. Сего ради Церковь Русская, прославляющи тя, Богу вопиет: Аллилуиа.

Икос 9

Ветии зломудреннии тщася оболгати тя клеветою, помазанниче Божий Николае, ты же, евангельски вся терпя, о благочестии народа православнаго попечение сугубое прилагал еси. Сего ради, память твою светло празднующе, воспеваети ти сице: Радуйся, прославления угодников Божиих добрый рачителю; радуйся, пастыря Кронштадтскаго благоговейный почитателю. Радуйся, Саровских торжеств державный возглавителю; радуйся, иноческих обителей благочестивый покровителю. Радуйся, духовных вертоградов усердный попечителю; радуйся, православных храмов боголюбивый здателю. Радуйся, Святыя Земли и Афонския Горы щедрый благодетелю; радуйся, устройства Церкви Русския мудрый ревнителю.

Радуйтеся, царственнии страстотерпцы, земли Российския хранителие и молитвенницы.

Кондак 10

Спасти хотя люди Российския от розни братоубийственныя, царю Николае, престол земный оставил еси, обаче, на милость Божию уповая, непоколебимь в вере и

благочестии пребыл еси, воспевая: Аллилуиа.

Икос 10

Стена и ограждение бысть Господь тебе, царю Николае, Ему же тепле молился еси, да сохранит державу Российскую от нашествия иноплеменник и братоубийственныя брани, наипаче же люди православныя во благочестии да укрепит. Сего ради благодарне воспеваем ти сице: Радуйся, полков Российских мудрый предводителю; радуйся, ратных людей христорубивый попечителю. Радуйся, отечества нашего державный хранителю; радуйся, словенских народов ревностный защитителю. Радуйся, мечи на орала перековати народы призывай; радуйся, мир имети со всеми языки преискренне желавый. Радуйся, благоверным князем в благочестии подражавый; радуйся, образ царя православнаго во смирении миру явивый.

Радуйтесь, царственнии страстотерпцы, земли Российския хранителие и молитвенницы.

Кондак 11

Пения всякаго достойна память ваша, святии царственнии страстотерпцы. Вы бо, образ исповедничества и ревности по Бозе верным людем показавше, заповедасте не мстити злодеющим, паче же прощати гонящим и молитву творити за них, поюще Богу: Аллилуиа.

Икос 11

Светоносный светильник седмочисленный вемы вас, святии царственнии страстотерпцы, царским бо путем шествующе, уготовасте себе за Христа пострадати. Темже, просветите омраченная сердца наша и евангельским путем шествовати научите нас, прославляющих вас сице:

Радуйтесь, агнцы незлобиви, Агнцу Божию в кротости подражавшии;

Радуйтесь, образ терпения в злостраданиих верным показавшии.

Радуйтесь, во всем житии совесть чисту хранившии;

Радуйтесь, убиение незаконное смиренно восприемшии.

Радуйтесь, седмочисленнии страстотерпцы, во едином душе Богу представшии;

Радуйтесь, кровию мученическою землю нашу обогрившии.

Радуйтесь, лик благоверных царей и князей восполнившии;

Радуйтесь, собор святых земли Российския украсившии.

Радуйтесь, царственнии страстотерпцы, земли Российския хранителие и молитвенницы.

Кондак 12

Благодать изрядну Бог дарова Церкви Российстей, прославив вас на Небеси, царственнии страстотерпцы, хранителие и покровителие страны нашея. Сего ради и мы на земли почитаем вас, Богу вопиюще: Аллилуиа.

Икос 12

Воспевающе подвиги ваша, царственнии страстотерпцы, прославляем Триединого Бога. Вы бо соизволением Отца Безначального, совершением Сына Единородного и содействием Святаго Духа Божия причастницы Царствия Небесного соделаетесь и заступницы отечества нашего являетесь. Сего ради дерзаем взывать вам сице:

Радуйтесь, яко прославлению вашему Церковь радуется;

Радуйтесь, яко чудеса вашими вера укрепляется.

Радуйтесь, яко образы ваши мироточением прославляются;

Радуйтесь, яко в честь вашу храмы создаются.

Радуйтесь, яко житием вашим люди благочестию научаются.

Радуйтесь, яко терпением вашим во страданиях вернии назидаются;

Радуйтесь, яко евангельския заветы исполняти нас наставляете;

Радуйтесь, яко беды и скорби мужественно нести нам помогаете.

Радуйтесь, царственнии страстотерпцы, земли Российския хранителие и молитвенницы.

Кондак 13

О, святии царственнии страстотерпцы! Примите от нас похвальное сие пение и милостивым вашим ходатайством умолите Царя Славы мир стране нашей даровати, Церковь в Православии и единстве сохранить, нас же во благочестии утвердити, да вопием Богу: Аллилуиа.

Трижды. Таже Икос 1 и Кондак 1.

Молитва

О, святая седмице, царственнии страстотерпцы, Николае, Александро, Алексие, Марие, Ольго, Татиано и Анастасие!

Вы, союзом любви Христовы связуеми, дом ваш, яко малую церковь, благочестно устроили есте и смирением себе посреде земнаго величия украсили есте. В годину же братоубийственных брани и гонений безбожных во отечестве нашем, все упование на Бога возложивше, образ терпения и страдания всей земли Российстей явили есте и, молящися о мучителях, клевету, узы и изгнание, глумление, насмешение и оболгание, убиение и телес поругание мужественно претерпели есте. Сего ради от земнаго царствия к Небесному прешли есте и теплии ходатаи о нас явились есте.

О, святии угодницы Божии! Молитесь о нас Богу, да Церковь в единомыслии и твердей вере соблюдет, страну нашу миром и благоденствием оградит и от междоусобных брани и разделения избавит, власть предержашую умудрит, воинство мужеством украсит, народ от разорения сохранит, супруги христианския в верности и любви укрепит, чада в благочестии и послушании возрастит, и вся ны купно с вами сподобит воспевати Пречестное и Великолепое имя Живоначальных Троицы Отца и Сына и Святаго Духа ныне и присно и во веки веков. Аминь.

Иная молитва страстотерпцу царю Николаю

О, святой страстотерпче царю мучениче Николае! Господь ты избра помазанника Своего, во еже милостивно и право судити людем твоим и хранителем Церкви Православныя быти. Сего ради со страхом Божиим царское служение и о душах попечение совершал еси. Господь же, испытуя тя, яко Иова Многострадальнаго, попусти ти поношения, скорби горькия, измену, предательство, ближних отчуждение и в душевных муках земнаго царства оставление. Вся сия ради блага России, яко верный сын ея, претерпев, и, яко истинный раб Христов, мученическую кончину приемь, Небеснаго Царства достигл еси, идеже наслаждаеши Вышня славы у Престола всех Царя, купно со святою супружницею твоею царицею Александрою и царственными чады Алексием, Ольгою, Татианою, Мариєю и Анастасиею. Ныне, имея дерзновение велие у Христа Царя, моли, да простит Господь грех отступления народа нашего и подаст грехов прощение и на всякую добродетель наставит нас, да стяжим смирение, кротость и любовь и сподобимся Небеснаго Царствия, идеже купно с тобою и всеми святыми новомученики и исповедники Российскими прославим Отца и Сына и Святаго Духа, ныне и присно и во веки веков. Аминь.